



LAMKA SOUTH PRESBYTERY KIKHAWMPI 13-VEINA



LAMKA NORTH PRESBYTERY KIKHAWMPI 13-VEINA



TANGGAM PRESBYTERY KIKHAWMPI 13-VEINA

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



KIPAK PUM AH LALPA NASEP

- Kochuam kiphudetna (Taksa leh Thagau)
- Kochuam Nute Panlakna
- Synod Kikhawmpi 3-veina mathîl

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalmingsang
 : Upa S. Lalpi
 : Pi Hawipakkim, Secretary, CKNP
 : Tv. Lianmuanthang, Secretary, CKKP

Business Manager : Pu Langlalthamuan
 TPC Office D. Phailian
 P.O. Box 107 CCPur-795128 Manipur
 Phone No. +91 9958160325
 Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. KIPAK PUM AH LALPA NASEP	03
4. KOCHUAM KIPHUDETNA (TAKSA LEH THAGAU)	11
5. KOCHUAM NUTE PANLAKNA	15
6. SYNOD KIKHAWMPI 3-VEINA MATHÎL	18
7. SERMON	
a) Ngaidamna	25
b) Gintu No. 2 la hi em?	29
c) Kipak pum ah Lal nasep	34
d) Zu (wine) mihingte melma (enemy) lianpen pen a hi	37
8. KNP HUANG	45
9. SUNNA	47

SYNOD PUIPATE

Moderator	:	Rev. Kamkhotinthang Neihzial
Secretaries	:	Rev. Thanglianlal (Sr.) Rev. Andrew LR Khiangte (Jr.)
Finance Officer	:	Rev. S. Khaikhawlam
Statistician	:	Upa S. Thongzalal
Executive Secretary	:	Rev. S. Lama Vaiphei
Consultant	:	Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Presbytery Kikhawmpi lawting tak ah i matzaw thei ziak un kipak thu gen hitiu.
2. Synod Kikhawmpi 3-veina (2024) taksa leh thagau ah lawting tak ah mat a hi theina ding in pauchap hitiu.
3. Bialtu Pastor, Pro. Pastor, Minister, Evangelist, Kochuam Upa, Tual Upa leh Revival Speaker-te a ding in pauchap hitiu.
4. Gamsung buaina ziak ah panlatu pawl chuam chuam ah puitute â ding in pauchap hitiu.

KIPUMKHATNA

Tangphai Presbyterian Kochuam Provisional Synod Kikhawmpi a thum veina chu November 19-24, 2024 sung a hin S. Munnuam Pastor Bial in, S. Munnuam Kochuam Biak-In ah ei zintun ding a hui. Zia hun ah i thupi ding uh chu KIPUMKHATNA ti a hi. Vaiphei te bep hilo Manipur gamsung ah thingtang miten i taksap pen uh chu kipumkhatna hi a hi. Zia thupi hi lunglut tak in kizil thiam gua hi tiu. I nam puitu ten le zia thu hi a ngaikhawk ua panlak dan zat chuam chuam mu di a um zel hi. Tuni ah Tangphai Presbyterian Kochuam kiti hi i nam puitute leh intellectual lamte a kipat hung kipan in, Kochuam puitute leh a pang thei thei pang in tuni dinmun hi i tung uh a hi.

Khawvel angka leh chunglam angka hi a la kibang sek pua, hethiamlo ten chung lam ah hung kipan Lal Jesu kha lomang bang a la pai ua, tuni tiang a hinle gingtu kiti te lak a hin zia angka ziaka Lal Jesu phatsan hi um nalai thei maithei a hi. Chunglam angka a chun numei leh pawsal a kicheng ualeh pumkhat ti a hia ($1+1=1$), Pa leh Chapa leh ThagauThiangtho chu pumkhat ($1+1+1=1$) ti a hi nalai hi. Zia tak ah kilang Chiang ma ma chu pawlam mellat dan sang in sunggil lam kipumkhatna hi chunglam ngai pawimaw zawk a hi ti a hi.

Kochuam bep hilo i nam sung leh i insung kipumkhatna hile i ngai pawimaw ding uh a hi. I nam a kipumkhat theilo a hi chun i Kochuam hinle hung thuak to zel ding i hui. Kipumkhatna ding a chun kithumatna a pawimaw hi. Pathian in i puitu ding ah ei guatpiak te thumat hi Pathian thumang i hui a, thuawi hi Pathian thuawina a hia, thuawilo kawm ah kipumkhatna ti hi a um thei puai.



Kochuam Huang

Presbytery Kikhawmpi

I Synod sung ah Presbytery pathum (3) umte'n October 10-13, 2024 sung in Presbytery Kikhawmpichu Taksa leh Thagau in lawting tak in a kimang thei hi. Lamka South Presbytery chun Mata Vengpi Kochuam Biak-In ah "Hin Khrista" ti Thagau lam thupi mang in, Synod ai-aw Palai in Upa Thongzalal, Statistician a pang hi. Lamka North Presbytery chun Hill-Town Kochuam Biak-In mun ah "La gam hung tung hen" ti Thagau lam thupi mang in, Synod ai-aw palai in Rev. S. Lama Vaiphei, Executive Secetary a pang hi. Chuleh Tanggam Presbytery in Munpi Kochuam Biak-In mun ah "Lalpa â ding ah ginumna" ti Thagau lam thupi mang in, Synod ai-aw palai in Rev. P.B. Zosapthara, Consultant a pang hi.

Khawvel Sunday School Ni

Kochuam te'n kumsin ah i lah mat zing Khawvel Sunday

School Ni chu November 3, 2024 hi hung hikit ding a hita, i Synod Puitute'n tukum thuzil ding ah ei guatpiak "John Calvin" Piting thuzil leh "Sadhu Sundar Singh" Naupang thuzil ah kipat malzawlina tamtak tawh Khawvel Sunday School Ni mangthei chiat ding in kisakhawl hitiu.

Synod Kikhawmpi 3-veina

Synod Kikhawmpi 3-veina chu November 21-24, 2024 sung in S. Munnuam Pastor Bial zintunna in S. Munnuam Kochuam Biak-In mun ah mat hiding a hi. October 19, 2024 ni'n Executive Committee Meeting, October 20, 2024 ni'n Synod Pastoral Committee leh October 21, 2024 ni'n Synod Nomination Committee Meeting um ding a hi. Synod Puipate, Committee chuam chuamte, Palai-te, Zintunte leh Kikhawm ding zosiate'n Taksa leh Thagau ah Synod Kikhawmpi i lawkpi chiat theina dingun Pauchapna'n delzui zing hitiu.

“KIPAK PUM AH LALPA NASEP”

~ Rev. Ph. Thianneilal
i/c Delhi Presbyterian Kochuam

*“Kipak pum in Lalpa na sem unla, La sa pum in a ma’n hung
tau in.” (KJV) Sam 100:2*

I kingaknau Bible châng hi thu hawi tak leh Pathian in mihingte a lam-et zingna pakhat a hi. English a chun Serve the Lord [Adonai] with gladness (AMP, CSB, CJB, NABRE, NASB95, KJV, NKJV, RSV, JUB); Serve Jehovah with gladness (ASV); Serve the Lord with celebration (CEB); Worship the Lord in gladness (FBV, GNBDC, GNT, GNBURK) tite a hi. Pathian Lekhabu Thiangtho (Vaiphei:BSI) sut thak pen a hin kipak pum in Lalpa biau inla ti a hi. Pathian biak hi Lalpa nasepna lopi pen tak khat a hi. Vansawlhakhte Lalpa na a sep uh lopi pen chu “Amen, Hallelujah” ti chu a hi (Thup 19:1-10). Ei-un le Vangam i tun phatu leh zia thumal ngei a hin Lalpa chu chawihawi ding ihu. Lalpa nasep ti hi mihing panglo ah Lalpa nasep genna le a hithei a, maleh tuni hin mihing in Lalpa na i sepna lam uh gen zaw di ihu.

A. Lalpa nasepna langsal deute vak tâklang hitiu.

Mihingte nâ tawh Lalpa nâ hi a kibang pua; ziagual ma chun a sep dan hile kibang lo tak a hi. Mihingte nasep

chu lungthim pang tho le le tha leh jung hat ah kistem a hi. Lalpa nâ sepna ding in vang tha leh jung sang inle “Hepina, diktatna leh titak zetna lungthim” a pawimaw pen hi.

1. Pauchapna: Pauchapna hi Pathian i biakna pawimaw tak mai a hia, ginna neite leh midikte pauchapna chu Pathian in a dawnhu sek a, thilpha tam tak a hun bawl zel sek zia in pauchap hi gingtute nasep pawimaw tak leh haksa tak a hia, maleh thil tampi hithei a hi.

2. Thilpiak: *“La go umna a chun la lungthim le um ding a hi,”* (Mt. 6:21) ti a hi dungzui in thilpiak hin lungsiatna, ngaikhâwkna, kiphalna, lainatna, thumatna leh kipiakna a etsak a, zia chu biakna leh Lalpa nasepna ah thil pawimaw tak a hi. Thilpiak hi Lalpa chawihawina leh a kiana kipak thu genna a hi. *“Kipâk taka plate chu Pathian in a kipâkpi hi”* (2 Kor 9:7) ti a hi zia in Lalpa pawm tâk biakna leh nasep chu thilpiak hi a hi. Sawma pakhat leh thawlawm thilpiak dang dangte kipâk taka pia thei nailo, tuakna di ngen chang tia phun mai

mai la hi khâk chun nang leh nang kijângvuk, Lalpa na sem nailo la hi thei hi. ATC ka umlai un gentheite leh nauchagate panpina zillaiten a hun guanggal sek ua; Nikhat chu piak di dang neilo in ka nei sun ₹100 chu kapia, ka lawite khat chun la pia tawm hi ti lam deu paukam a hun mang a, ken le “I, ka pia tawm hi, ka nei sun ka piak a hi,” ka ti leh a lungna, ka va kisil kal a khan ka wallet a la et leh a hawmkeu chu a va mu, ei lungsiat talua, sum neu khat ei la kawi piak a, ka le piak kit leh le kei kawi a hi puai, a ti ta mai hi. I thilpiak tâwmcha hin le nâ lopi tak sem thei a hi. Eima di bep i gel phat leh kipia phal sek lo a hi. Maleh midang dinga ihin phat leh mi le ei â dinga hung hing sek; Pathian le ei panpi dinga hung kisala pai sek a hi. Sawmapakhat vang vang chu i piaklo chun Pathian mâ gucha kihi mai a hi (Mal 3:8-15).

HINNA VÂK

I piak chun Lalpa'n thil bangkim ah ei malzawl in, i lou nasepna susia ding zosia ei venbit piak ding in a kitiam hi.

3. Midang nâ sep piak: Lal Jesu'n, "Ei sawlpa nasep leh a dawilam bawl chu ka an a hi," a tia, a nasep chu hawi taka i et chun midang na sep piakna in a hinkhua a mang zo vek hi (Mt. 20:27,28). Thilpha hi dingah hukdam ihu a (Eph 2:10) zia thilpha hi chu i khawsak dan ding ua Pathian in a la siamkhawl sa a hi. Entiam u! Lal Jesu khan ama dotute nâ ei ve a hung sep kha! I kochuam mite, i nam mite â dinga thil/sum phal lo, ni khat ziang le kipiadawk pei lo la hi chun Lalpa nâ chu sem pan nailo la hi thei hi.

4. Bible sim leh lâ sak: Jesu khan setan thepna a zawna kha *"Pathian thu in ziagual in a gen hi,"* a ti chet chet thei zia a hi. Nang leh kei hin thepna tuak in

ziltilna diklo mangten ei hung them taleu, Bible in tia hin a gen hi tia dodal malak sang in kizui dual dual maithei a hi. Aziakchu Bible i sim peilo zia kun i hechian puau a, bang chu a dik; bang chu a diklo tite kihelo a hi tak zia kun in a genthiam thiam kha kitaksang mai a hi. Ziagual ma khan ei Vaipheite hi lâ sak tuilo khat i hidiam u, Christmas leh Kumthak lenkhawp hi a nawplo deu deu bep hilo in lengkhawm di le kitawm hiai hiai ta hi in a kilang in, La hile i sak thei uh a tawm ma ma tai. Paul leh Silas te gual ah i manthainau, i saltannau khawvel nawpsakna kulpi apat lasak tam zia kun hung pawt ding kihi le chu; Lâ byheart ah a suak theilo zia kun a dam sung suangkul tang kitam ten leh a kilawm hi.

5. Midang hepi: Zia hi nasep ah puakdaw a haksak sek hi. *Nangma la kihepi gual in la invêngte (midangte) la*

hepi ding ahi (Mt. 22:39). Midang hepina lam ah i nasepnau vak kisuichian tiam hitiu. Kochuam Upa/Pastor/Minister hi ngal ah invêngte gamgi line kâwi leng lung (crooked) ziang semtu hikhai tiu. I hepité chu eima thil le kipiasek a hi. Lalgam kekliantu hilo ah eima plot kekliantu semtu/gingtu hikhâk pal a bailam hi. Miten la nunglam apat a hun nuisan sek ui ti kihiat in.

6. Kipâk zing: Kipâklona ding a tam sek hi maw! Mi zite/pawsalte i en a, mi chate i en a, mi lawtin dan te i en a, eima inkuante i vak et chun i da ma ma ni a tam sek hi. Maleh, thil bangkim ah kipakna chang hiat hi kipâkna a hi tak zet hi. Cha nei zosia, a lawting zosia, service nei zosia kipâk a hi diak puau. Dâna châng helo te chun thangtâwmna ding leh thasiatna ding a hau un; kiphatlam/kisuanla nachâng helo te chun mi thiammawna

ding a hawl un awimawna ding leh lungnatna ding a hau ui. Min kithuapi zing maleh kipâkna chang helo hial mimâwl le a um sek hi. Kineusakna châng helote chu a kiletsak un, ama sanga lian leh lopi zawte musit a chang un lungnatna a kimu sek ui. *Lalpa a chun kipâk un ti kit ngen ingka kipâk un, la nunnemnau chu mi zosia hiat hi hen* (Phil 4:4,5). Min a kawina sanga kikawi sangte a kipâk thei puai; phunna di leh vuivaina di a hau sek ui. Ziagual mite chun Lalpa nâ a sem phachuam thei puau.

7. Thilsiamte duat taka etkawl ding: I cha leh naute, insung mite leh mihing chanpité i duat ah i hepi chun i bawl phau, maleh amau bep chu Pathian thilsiam a hi puau a, a dang tampi um nalai a hi ti vak hia zawm nalai leu hin Lalpa na i sepnau hi sembukim thei ding ihu. I chateu In ngak ah i nusia

HINNA VÂK

ua, gim leh chau taka lou
apat i hung kile phat uleh
mei le kitik lo, tui le umlo,
akcha i nei sunte a la that
gam sik seku henla, insung
a kihelnau le a la thâng
zeng zung taleh lungnat
um ma ma ding a hi. Zia
gual ma chun khawvel ah
thil um zosia hi eiu etkawl
dinga Pathian in ei nutschau
a hi. Gamsate leh vachate-
i huan leh thai susialo
tampi, eima zawk in i
phatchuampite meithal/
gawphel in i kâplum tawp
tawp ua, kâp phaklote
thâng i kamkhum kit ua
hun chawmkhat chu i kipak
ma mau hi. Maleh, vacha
um talo chu khauphâk te,
lung chi chuam chuamte
a hung zalen ua, i lou ua
thaichite a hung nesia
zel ua, i lungkham nau a
hung kibelap zel sek a hi.
Thingkung lian lian i phuk
ua, i mamaw le hilo sum
dawina zia in midang in
garí'n a hung kipuak ua,
i gam uh thingphung a
tâksap tâk zia in a sat a
dap a hung kitheng zung

zung ta, a chaw kha chu ei
uh ma ma ihiu. Biak-In ah
lasak leh sermon ngaithâk,
chuleh missionary va kuan
khel khel hi Lalpa nasep
a hilo zia hedawk thak in
kithak pat lungthim pu'n
pan lathak hitiu.

8. Phunnate kipâkna ah

chan sak: Sam 73 hi isim
leh mihingte hin phunna
ding i hau zia, lung-
awilona di ngen a hi zia a
kichian hi. Mi phun hatte
chu mi lung-awilote a hi
deu sek ua, suanlam siam
le a thiam ma mau hi.
2015 Synod Kikhawmpi
Tuikual South ah Pro-
Pastor dinga kawidetna ei
nei nau ah ei fuinau thu ka
hiat apat Lalpa na ka thei
kham kham ah ka hung
sepna hin a thei ham chun,
"Suanlam siam lo ding," ti
ka chiapi a, ka kipâk zing
hi. Thil ka hikhial chang
inle ka nú in present of
mind la nei puai, la kigen
thiang sek puai tí'n ei
zachâk pi sek hi. Maleh, a
hilo khat a hi gual ah vak

gen ah suanlam siam chu ka nuam puai. Kawlhen Bial ah ka um lai in Finance Committee in ei guat ve ua, gua zuk hun sung chu gari dawigual in a um sek pua, S. Kholian tiang kêng ah dakkal 4 chia in committee ka del tun tun sek a, gari a um puai, hung da mai ka vak ti'n tia ei hil le a um sek a, en le i gen nawp châng a um sek hi. Maleh, Suanlam siamlo ding ti ka hi zia in kipâk pum in khawsa-ul tawh gua thawk tawh pâkna la sa'n "Chiazing hitiu aw Zion chate," ti zel chu a hi mai sek tai. Unau! La phunnate kha tepte inla kipâkna chansak ding ngaitua in. Pathian laka le lungawilo thei, phun thei, insung mite leh midang chung a le lungawilo thei a hi. Lalpa nasepna ah vuina leh phunnate hi lâwkna umlo pen tak a hi. La phunnate chu sukbeina ding in thil dik bep bawl in, a hun chên la nâ chu sem in, la umna ding mun

in um zing in, dân phal lo thil haisan in, hepina leh phatchuam ngai tak in Lalpa nâ sem in, chutileh min la chung a thilsia hun bawl ta le le Lalpa a chun kipâk ta ding la hi.

B. Bang zia ka kipak pum ah Lalpa na chu isep diu a h'em?

Pathian in Israelte gawtna nasa tak a piakna zia leh nam dangte puimang leh sukgenthei a hina zia ku chu *"Lalpa la Pathian nâ kipak leh thanuam tak ah la sep piak nawplo zia kun ti a hi,"* Deut 28:47.

1. Lalpa nasep hi na lopi leh pawimaw pen a hi zia in kipak taka i sep diu a hi. Nehemiah chun Lalpa nasep chu na lopi tak mai sem a hi zia a kihetchian ma ma hi. Tobia, Sanbalat leh Geshemte chun Ono phaijang ah hung suk in kiho hitiu a ti lai inle nutsal a gua kei puai. Robert Jaffray chu China gam ah missionary ding a

HINNA VÂK

kona lunggil ah a dawn ni kipat chun China pau a kizil a, a hung thiam ta ma ma hi. Tichun, a hun lai ah Oil Company minthang Standard Oil Company chun a hun hia tau a, Jaffray chu tha law tamtak nei ding in a hun offer ua, maleh ama chun chawmcha'n **"No, thank you"** (Ka ut puai, ka kipak hi) tin a dawnhu hi. Chawmkhat zaw in a hun contact kit ua, a masa a law ding zat sang ah ale ni ah tamzaw a hun pia kit ua, maleh a dawnhuna ngai ma, **"No, thank you"** chau in a dawnhu hi. Tha bangzat hem nung in a hung dêwp kit ua, a law dingzat chule ama dawi zat zat himai ding in (at any cost) tiin a hun jawl kit ua, zia chun vang sau deu in, **"a thalaw a tam in, a na vang a nep ta luai,"** tiin a dawnhu hi. Lalpa na lopi zia leh a nasep pawimaw zia hia ten nâ dang tawh a te thei puau in, min IAS hina natiang le haisan in

missionary nasep a sem nuam zaw sek ui. CT Studd khale mi minthang tak, national cricket player hi zo a hia, chun a pa golua ding tam tak le nusia in Jesu nungzui in missionary in India, China leh Africa gam in haksatna tamtak a hun thuak hi. Lal Jesu chu kei a dinga hung kipia a hi zia in ama a dinga thilpiak lopi talua a um thei puai. Hinna pakhat chau i nei ua hun khat ni leh hung bei ngei ina; maleh, Lalpa a ding ah i septeu hi vang kumtuang in um zing ding a hi a ti. Lalpa nasep lopi zia hethûkte chun vuina, thatdana leh lungawilona gen in a phun phun ngai puau. Chuti malak in lungawi tak in zia khawvel ahin gentheina tam maleh kipak pum in Lalpa nâ a sem zel seku a hi.

2. **Lalpa phatna zia in kipak pum in Lalpa na sep ding a hi.** Sam 34:8 a chun 'Aw *Lalpa phatzia chu tep in hechian ma tiam un,*' ti imu

hi. Thingtang me hi Delhi ka umna hin kawlte hin a du kei puau. Maleh, eimite hin i du ma ma ziang ui. Bang zia? I neu ua kipat itep zing sa, i nek zingsa ahi zia in i du un, tui i sa ma ma mai uh a hi. Zia gual ah i tep zing sa thil tui sak theina chu 'acquired taste' ti a hia, zia chun thil i tep zel chun tui a kisa thei mai hi ti a hi. Ziagual a chun Pathian phat zia hile tepsin gua'n a phatna hiat daw ngei gua leu hin Lalpa chu kisel mang ziang ding in ka gingcha puai. Sam ziktu chun 'la Biak-In phatna' tite a gen sek a, Biak-In nasan in phatna a nei chun Lalpa Pathian in phatna a hau di zia chu a kichian hi.

- 3. Pathian umpina thutiam zia a hin kipak pum in Lalpa na sem hitiu.** Chanchinpha hil dinga Jesu'n a nungzuite thupiak lopi pen a piakna a khan a umpi zing ding thu le a tiam hi (Mt 28:16-20). Stephen chu selup a guat lai ua

khan "En tiam un, vante kihong leh Mihing Chapa, Pathian changlam ah ding chu ka mui," a ti (Nas 7:56). Danielte lawipa châte kha meipi lak in a umpi zing hi (Dan 3:25). Joseph khale Lalpa'n a umpi zinga Aigupta governor hial a hi sak hi.

Thutawpna: Kochuam ah la kipâk theilona, insung ah la kipâk theilona ziahte vak ngaitua tia! Chapona zia a hi nuam sek hi. Thugen in ei guat puau tia lung-awilo la hi em? Kochuam program la ngai pawimaw em? Mi hina en inla nang hina vak ki-en tia, a lung-awi lo thei hikhel puan la. Thilpha bawl ah i phaklo ten le thugen a chû puau, challeng nawpna leh ka thu hi ngei le, ei hiatsak ut puau tina lunggel hin lung-awilona leh buaina a um nuam sek hi. A thuneitu, a gentu hi sang ah zuitu ginum hi a lopi zawi. Lalpa nasepna ah i kipâk theilona pen chu i chapo zia leh banghem khat bik ah i kikawi sek zia a hi sek a, zia chu paimang hitiu, lung-awi lo ah ei siamtu a hi.

“KOCHUAM KIPHUDETNA (TAKSA LEH THAGAU)”

~ Rev. K. Jama Vaiphei
S. Munnuam

*“Pathian kochuamte, a chapa thisan ah a lei sate chu vak ding in, nang haw leh la gangualteu chung ah chun ching thei un....”
Nasepte 20:28a”*

Kochuam chu bang a h'em? J.N. Darby chun kochuam chun “Pathian mite kikhâwm khâwm, a thisan ah a chawksate chu a hui, a tia. Pathian chun a chapa thisan ah kochuam chu a chawk a hi” a ti'i. Chuti chu a hileh kochuamte chu mi hawn kipawl khawm mai mai hilo in Jesu Khrista tatna gingcha leh pawm mi kipawl khawm a hi tina a hi. Zia kochuam ah chun mizia chuam chuam pâwl khat in a umu a hi. Kochuam neitu chu Pathian a hia, bailam tak cha a phudaw a hi pua, a chapa changkhat neisun chu hun sawl in thing kraws lêk ah khaikâng ah um in mihingte gitlo man chu a hung peta, zia nasep gingchate chu kochuamte a hui.

1. Kochuam kiphudet hi ding chun:

Zia kochuam ah umte chu thagau lam ah:

- i) Kochuam thugin bulpi Pathian a mi pathum - Pa leh Chapa leh Thagau Thiangtho (Trinity thugin) pawm a hi diu a hi. Thugin

ah kichian, awn vêl vêl umlo kochuam a hi di a hi.

- ii) Chanchinpha puanzâk ngâikhâwk kochuam a hi ding a hi. Amau lak ah khangthak hung um zêlte Sunday Skul leh Evangelistic Campaign, Vacation Bible School haw ah ziltîlna

leh kaihuaina ngaikhawk,
khanglaite, hun pum leh
hun pumlo ah le Pathian
na sep ngâisâng ding ah
kiziltîl kochuam a hi ding a
hi. Zia bân a chun gamthak
nasepna – pauchap, thilpiak
leh taksa ngêi ah kuandawk
theite kuandawk ding ah
kiziltîl kochuam, khanglaite
na sepna di lemchâng siam
piak kochuam a hi di a hi.
Pauchap, thilpiak leh taksa
a luangdawk kochuam a hi
di a hi.

iii) Kochuam ah umte chu -
Mihing thithe bang hun
ah le mimal mal thi ding ah
kisa zo leh lopitak ah Jesu
Khrista van sôm chung ah
a mite a hawn ah pui ding
ah a hung di kinem tak ah
ngâk mi a hi diu a hi. Mani
ngaidawn ah ni leh phât
ding haw po tiam mi a hilo
diu a hi. “Zia ni leh hun ding
chu kuama’n a he puau in,
vansawlchâkte leh chapa’n
le a he pua’n, ka Pa bep in a
hiai” ti a hi ngâl ah (Matthai
24:36ff).

Kochuam chu taksa (muthei
lam) a le detdo tak a hi ding
chun:

a) Mi a tam ding a hi. Kochuam
member tâwmcha chu
kochuam buldet a hi thei
pua’i. Kochuam member a
tam deu a ngâi hi. Kochuam
buldet i hi guat chun
kochuam membrete umna
khua, vêng taphawt ah
Biak-In a din di a hi. Biak-
In a gamlat phat leh mi
kithadate a di’n paulap di
a bailam hi. Tulai a khawvêl
ah kochuam hâtte’n a uar
uh chu ‘Small Group’ a
hi. A kochuamteu hawn
tâwmcha cha’n a khen ua,
eiu’n Beigual tha phât leh
Upa Bial ah i kikhen ua, In
taw i ha bawl gual ua hin a
kochuamteu a tam thei pen
in ngam tak ah panna chuam
chuam, thugen, kipauchap
piakna leh a haksatnateu,
a kipaknateu a gen ngamna
diu kipawlkhawmna a siam
piaku’i. Mun khat ah tampi
kai khawm hi nuam in pha
maleh veng chuam chuam
a h’em, veng lian khat ah le
Biak-In pani, pathum a um

HINNA VÂK

chun mi tamtak in pan i la thei a, a kithada di a tâwm a hi. “Kuama mi pawimaw hi di utlo umlo a hi” ti khawvêl ah lekhazik thiam minthang Dale Carnegie’n a ti gual in.

2. Kochuam muthei lam ah a detdo a hina ding a chun thawlawm lam ah a hausat a ngâi hi. Thawlawm ah hausa ding chun a pia a tam a ngai hi. Member a tam leh a pe di tam ziang a hi pua, kochuamte thilpiak lam ah a hakatu a ngai hi. I kochuam in committee nei sîn, khawmpi sîn, financial year kichai sîn leh thawlawm report i bawl seku hi i hatnau thuguk khat a hi. Kochuam tin in Finance Committee i nei guat diu a hi. Mi zosia Kochuam Committee in i pang ziang thei puau ah, Finance Committee i nei leh mi tamzaw kochuam a tâ san theina (involvement) lemchâng siamna leh thawlawm sukpunna matchâk pachuam a hi. Finance Campaign kumsin leh i neu hi le thawlawm lam in i chau tau hen kituaitak hitiu ti a kibawl ei pua’i. Kochuamte kiang ah

thawlawm report bawl kawm ah kipakthu genna leh hapan zêl hitiu ti ah i dinmun leh panlâk zêlna di’n kiihiatsakna leh kiziltilna a hi.

3. I umna kochuamu Presbyterian a phatna tak khat chu gamthak na sepna ngaikhawk kochuam a hi hih a hi. Synod khat hi ding chun Mission Field a nei a ngai hi. Gamthak na sepna luang dawk theilo kochuam chu kochuam hing leh buldet a hi thei pua’i. Gamthak na sepna ding chun paisa bep a pawimaw pua, mi kipia a tam a ngai hi. Mihing (human resource), thawlawm (financial resource) leh pauchapna (prayer movement) a pan khawm di a hi. Pauchap chap ziang, thawlawm le pelo, thawlawm le a tam a tam ta, a va gen ding ah kuan dawk i umlo chun kua’n va gen di a h’em? A hiat lo ua leh bang ti ginchâk di ti gual khan (Rom 10:13 – 15).

4. Kochuam kiphudet hina ding ah pawimaw diak pakhat chu – tu ah i zui laiui Team Leadership/Committee

Leadership hi a hi. Khawvel ah company liante chu managing director kha a chairman a hia, ama kha zia company khan a thunei pen a himai hi. Ei kochuam hi chu zia gual ah ‘Changvâl Leadership’ chu a hi pua’i. Collective Leadership, a tamzaw’n pha a sak sakna lam ah pûk a hi. A chuti zing lai a chun a tamzaw’n phasa lehle kikaihuaina Dânbu tawh a kituaklo chun majority sang ah thunei zaw chu Dânbu a hi. Dânbu tawh kikal lo zosia ah chun Committee leh Khawmpi Palai a tamzaw’n pha a sak lam lam ah chia a hi. Mimal ngaidan pha ma ma, Committee’n a pawmpi theilo a um lehle a pawmthei hun ngâk zaw a ngâi hi. A chanchum a bangna chu – thil kinkhâwk ngaitua lo theilo haw a um phât leh O.B./O.M. in ala ngaitua ua, Committee phât leh report a bâwl thei a hi. Kial laplo ti um thei diaklo a hi.

I changtelu hi i sim zel chun “nanghaw leh la gangualteu...” ti i muu ah, a gangualteu, a belamteu a etkaw! phat theina

ding ua chun a belam puteu chu a mau leh amau kienkaw! thei a hi diu a pawimaw masa a hi. William Mac Donald chun “Paula hin Upate/Kochuam puitute chu amau thagau lam di’n mun kiet tupmasa ding in a hil ah, a zia chu Pathian tawh kipâwl zing mi a hilo u leh Kochuam ah thagau lam puitu (guide) hi theilo di a hiu” a ti a hi. Zia umzia chu Pathian tawh kipâwl zing puitu chu Pathian in mapui di a hi. Pathian mapui puitu chun bâwlkhial tâwm di a hi tina a hi.

Kochuam kiphudet (buldet) hina ding chun muthei leh mutheilo ah kibulphuna ding ah pawimaw dang tamtak um maleh a pawimaw diakte chu i gen tau ah, zia haw zosia sang ah pawimaw pen chu Pathian bangkim hitheipa pilna, vaihawm thiamna, hausatna leh mapuina muang ngam kochuam i hiu a ngai hi. Mit ah muthei khawi khâk thei ah i kingakna zosia a puksiat lehle a tung ding thak thei Pathian i muan diu a hi.

“KOCHUAM NUTE PANLAKNA”

~ Pi Kimboi
General Secretary, CKNP

“Ka thu hiatpite hung hi di la hiu” Nasepte 1:8

Sungkuan tin ah luchang chu Pa a hia, luchang hîna dawl in, Insung ah mawpawtu leh vaihawmtu pên a hi. Insung ah pa vaihawmnate sukpitinna ding in, Insung mimal tinte’n i theidân chiat ua sephawm a ngâi hi. Zia gual ma chun, Tualsung Kochuam, Bial leh Synod ah puitute vaihawmna nuai in, Kochuam nute chun Lalgam nâ a kîsem hi. Kochuam Numei Pawl chun Kikaihuaina Dân Bu mumal tak a kinei a, zia dungzui a chun, Kochuam tin KNP-te’n Insung leh Kochuam a di’n pan lâkto jel a hi. Kochuam Numei Pawl hin thiltup pali (4) a nei hi. Ziate chu:-

1. Kochuam pumpi nasepna suhbuting ding ah sephawm. Pathian Lalgam nasepna hi chiapi a hi.

2. Khristian Inkuan suhdet ding ah sephawm. **1. Kochuam pumpi nasepna suhbuting ding ah sephawm:**

3. Panpi ngâite Khrista min ah panpi. Kochuam pumpi nasepna a hin nute hin dinmun

4. Chanchinpha puanjak. pawimawtak mai i nei ui. Kochuam Numei Pawl hi fellowship a hia, Church Court sukhka thei thilte chu a ki

Nute hin zia a chung ah thiltup palite hi mangcha’n,

sêm ngai puai. Kochuam nute chun Kochuam Committee hêtpi in Kumbul vaihawmna a kinei sek in, kumkhat sung ah sep leh bawl di guanggal a hi sek hi. Anchangham etkâina chu Kochuam nute khut ah ngak a hi dungzui in, anchangham kawite, dawlkhawmte leh zawkte a hin pan a kilâ, zia hi Kochuam pumpi nasep sukbutinna khat a hi. Kochuam Committee vaihawmna nuai ah nute sep di dawl chu Kochuam nute'n a kisêm buting sek hi. Biak-In cheihawite, Kochuam nibîk ah nêk-leh-châk bawlte tiang inle, theidân dân in pan a kilato jel hi. Zia gual ma chun, Bial leh Synod ah te'n le Committee-te vaihawmna ah nute sep ding ah ei kiguan piakteu ah chun, pan a kila sek hi.

Kochuam Numei Pawl chun Anchangham ah Lalgam nasepna pawimawna leh phatchuamdântehi Kochuam, Bial leh Presbytery huap in seminar-te nei in, a kitângkopi sek hi. Anchangham a pat

sum kimute hi Synod sêmtu chawpna ah mat a hi sek hi. Kum 5 chiata sung ah anchangham i mû danu chu zia gual hi a hi.

Kum	Kg. zat
2019	2,51,757.50
2020	2,38,100
2021	2,27,494
2022	2,75,215
2023	1,69,492

*Source- CKNP Kum sîn
Secretary Report Khaikhawm
Bu*

2. Khristian Inkuan sudet dingah sephkawm:

Kochuam Numei Pawl hin Khristian Insung phûdet nâ ngai pawimaw in, Insung Kikhawpna pawimaw dân seminar-te, Khristian Inkuan Campaign-te nasatak in a kichiapi hi. Ziate hi mangcha'n, Insung ah taksa leh thagau ah nu mawpuaknate, Insung kikhawp phatchuamna leh ngaikhawk di a hîdân leh a nei didânté nasatak ah ki ziltîl a hi sek hi. Khristian Inkuan sukdetna ding ah Insung kikhawp ah pan i lâk danu chu zia a nuai a hin vak tâklâng leu hin-

HINNA VÂK

Insung kikhawp neidan			
Kum	In zat	Nisin neithei zat	Percentage
2019	3095	641	20.71%
2020	3205	832	25.96%
2021	3394	971	28.61%
2022	3464	1009	29.12%
2023	3104	770	24.67%

Source- CKNP Kum sîn Secretary Report Khaikhawm Bu

Zia a chung ah i sephawm dânu hung kitâklang a pat hin, mâ i sawnjel danu mûthei a hia, Pathian lopina i pia a hi.

3. Panpi ngâite Khrista min ah panpi:

Kochuam nute chun Kochuam sung ah damlote vêna a kinei tângpi sek a, pauchap piakna leh natvêna thiapiakte a kipesek hi. I gamsung buaina zia ah In-leh-lo hun taisante kithuapina thilpiak (van leh sum in), mi kiphalte a pat dawlkhawm in, panpi ngâite i la panpi’u a hi.

4. Chanchinpha puanjak

Pathian Lalgam kêklet a hi jel na ding in, sêmtu chawpna ahin theidân dân in sum leh pâi leh pauchapna’n pan a kilato jel hi. Chun, Khristian

Insung etkawl tûpna di leh hindân, paukam leh umchan ah chanchinpha puanjak a hi theina ding in nasatak ah kiziltîl in, pan a kila zing hi. Kochuam Numei Pawl in sêmtu chawp hi, tû dinmun in mi 12 a kinei hi. Pathian chu lopina chang henla, a tamzawsêm chawm thei ding in i mau puijel ta hen.

Zia a chung ah KNP thiltup palite (4) hi hâtzawsêm ah sep a hi jel theina ding in, CKNP chun Presbytery huap/ Bial huap in seminar-te, anngawl pauchapnate a kinei sek hi. Pathian Lalgam â ding ah pan i lâk thei sung un, i khutteu suhhât thak jel hitiu. Lalpa kipâkna chu i hatnau a hi ngâl a!

“SYNOD KIKHAWMPI 3-VEINA MATHÎL”

~ Rev. Thianganlim Vaiphei
i/c S. Munnuam Pastor Bial

*Zia thu chu a dik ngei ahi ti hetna dingin jawlneite thu ah chun:
‘Zia zaw tak chuleh hung kit ing ka tin, David biakbûk kha hung
lem thak kit ding ka hi; a sesa chu siamthak ingka tin tung ding
kit ding ka hi. Nasepte: 15:15, 16.*

I. Thumapui: Jerusalem ah Kochuamte kikhawmpi masa pen ah chun nungzui Jakob Moderator-na nuai in thubuai, thu haksa Judate leh Jentêlthe kikâl ah thu buaite vaihawmna sukfel a la hia, zia gual ah chun i Synod kikhawmpi thumveina hi le i gam leh nam sung ah buainate sukfelna’n lawting tak in kimang thei leh ti hi ka pauchapna leh kikhawmpi mathîlna ka lunggêl thupi khat chu a hi.

November tha Hinna Vâk ah sua ding Synod Kikhawmpi mathîl ti thupi zik ding ah Synod Office lam

ah pat hotute dawisakna ka chang ah, ka kipâk tak zet hi. Thu zik thiam hilo maleng hotute’n November tha Synod Kikhawmpi 3 veina zintuntu ding Bialtu Pastor ka hîna ah zia thupi hi zik ding ah ei guatu leh ngaidânte, ka kiguanggal dânteu zik ve leh ei tiu hi ding in ka gingcha, thei leh theilo in ka hung zik ve a hi.

Awle! Zik nawp tamtak ka nei ve ah, Mizoram Synod ah December 16, 2001 in Rev. S. Lalkhuma’n Manipur Synod Compound, Central Lamka mun ah ei lâwmlut ah, zia zaw a chun Joint District hawndawna

HINNA VÂK

July 7, 2002, 11:00 AM in a la kinei a, kum 8 nung in Manipur Area chu Presbytery pakhat ah hawnna February 1, 2009 kum in Jubilee Church, D. Phailian ah a kinei thei bep hi.

Hawngtu in Rev. Lalchhanhima, Moderator, Mizoram Synod a pang hi. Special Presbytery Hill-Town Biak-In ah a kimang ah, February 11-12, 2012 kum in hawngtu'n Rev. C. Vanlalhruaia Ex. Moderator, Mizoram Synod a pang hi. Zia Presbytery hawn daw thakte chu:

1. Lamka North Presbytery.
2. Lamka South Presbytery.
3. Tanggam Presbytery leh
4. Phaipi Presbytery a hui.

Kum 2012 apat in Presbytery pali (4) in A/S Administrative Secretary etkawlina nuai in kochuamte leh Pathian zal in kochuam chu taksa leh thagau lam in a hung kikhang lian zêl ah, thilpiak lam in le a kipung zêl hi. Kum 2022 October 22-23 ni'n Provisional Synod ding in PCI Moderator Rev. B.B. Lamin in Jubilee Kochuam Biak

-In ah hawnna ei hun nei piak hi. Provisional Synod hî nung in le kochuamte chu nasatak in i khang zêl ua. Maleh, khawk tak mai in Manipur gamsung ah nam kâl buaina chun 3rd May 2023 ah pat in ei hun sukkhâk tâk zia in Phaipi Presbytery huamsung ah bial a tamzaw a hung bei ta, zia bân a chun Lamka North Presbytery huap sung ah le Kangvai Pastor Bial, Sugnu Pastor Bial leh S. Kawtlian Pastor Bial te chu ei hun sukkhâk tâk zia in taksa leh thagau lam in i synod pumpi'n i thawk khawlaw ah, thawlâwm thilpiak lam in le nasa tak in a kikeniam hi.

Leilon Pastor Bial leh Jiribam Pastor Bial le bei zianglo maleh kihiatuana leh kikâwmtuana a hawi tak tak tâklo zia in duthusâm a pha zo talo a hi. Zia a chung ah gam sung buainate hi umlo leh, tukum hî Synod piting ah lânkai kum hung hi ding in i la kinêm a, Kangvai Pastor Bial in Kangvai kochuam ah Synod Kikhawmpi 3-veina ding hi a zintun dingua guanggal lawksa a hi kha.

Lopitak ah Synod Piting i lawp kumu hi ding ah kiguanggal chu, keiu vangphat ziak leh Pathian lemguat le hi zawn a, Synod Kikhawmpi 3-veina chu S. Munnuam Pastor Bial in S. Munnuam Kochuam Biak-In ah kisuangla tak kawm in kilâwp tak leh thanuam tak in Synod Kikhawmpi 3-veina zintun ding in ka kisau a, ka kipâk tak zetu a hi.

II. Synod Kikhawmpi mathîlna thagau lam hinkhua ah.

Pathian Thagau pawlna chang ah, Synod Kikhawmpi hi mat hileh ti hi ka pauchapna chu a hi. Ningkum ah gamsung buai ziak in palai hisâte bep in Synod Kikhawmpi vaihâwmna a kimang ah, Pathian biak kikhawpna a um theilo kha khâwk ka sa khawp mai hi. Tukum i synod kikhawmpi a hin chu kikhawpna pangai tak ah a chia thâk a, i lâwkpi chiatu kinep a um ah, a lawttin theina ding in i pauchapnau in delzui zel hi tiu.

1. Biakna lam: Pathian biak kikhawpna pangai tak in

um thei hen la, Pathian thugen kingai tha thei hen la, thagau lam malzawlna kidawn be leh ti hi ka kinêm a hi. Chuleh, Pathian chawihawina Lapawl, Bial tin apat Lapawl kiguatte'n le hun sa theiu hen la, nasatak in Pathian chawihawina Synod Kikhawmpina ah pat hin kidawng thei leh ka nuam a hi. Kochuam mipi lâ sak khawmna'n le kilâm dup dup thei hen la, thagau lam limna nasa tak hung tung hial leh duthusam a hi.

2. Vaihawmna lam: Synod kikhawmpi vaihawmna thum veina mang pan bep ding i hui a, kikhawmpi vaihawmna chiasa ta et in lungtungna tam tak a um hi. Chia zel ding leh khang zel ding i hi ziak in kivaihawmna lam ah nasatak ah khan zel, kizil zel, fel zel i thil tup lian pen hi thei leh ût a um ah, Synod Moderator ngâichâng kâwm in palaite'n feltak ah vai kihâwm thei leh ka nuam tak zet hi.

HINNA VÂK

I Mother Synod, Mizoram Synod hih kum 100 vâl kivaihawmna nei a tau a, khatvei le vaihâwmna buaisia khalo a hiu. Eiu le ziagual ah chun vaihâwmna fel leh kitûp i neiu ka lunggêl leh ka kinepna a hi. Vaihawmna fel leh kitup bep in thagau lam ah khantona dawi um ei pe thei ding a hi. Chun, palai vaihâwmte'n le member dangte ngâichâng kâwm ah Agenda-te kigen sek-te haw he zing kawm in, bawl zel leu hin ût a um a, kikhawmpi paumal mat dan chungchang ah le, mi suhna thei ding zawng leh mi kâp zawng ah paumal mat kisûm thei zel le hin pha ding in ka gêl ah, i hiat phâklo kâl ah ei la suhchangkangtu ziate haw cha cha hih a hi zia in kikhawmpi palai te zosia'n hiat zing ding in dawisak a um tak zet hi.

III. Synod Kikhawmpi mathîlna Administration lam.

1. Organising Committee
ka din ua, a nuai ah sub-committee chuam chuam ka din kitu a hi. Ziate haw

malâkna'n phûl tak leh kilâwp tak mai in Synod Kikhawmpi mathîl in mani mawpuakna chiat nâ ka sêmui. Organizing committee in Budget siam in, kochuam tin in piak ding a phût ah, zia budget te chu mangcha in kisinsakna a chia tha zing hi.

Synodkizilsakna "kikhawmpi zintuntute kithuapina piak sau sau di" ti hih i kizilsaknau a hina tawh kitawn in, Organizing Committee chun ka budget siamnau a le zia hih ka kineppi ma mau a, Pastor Bial tin ah hotu leh rawngbawlp i te'n mâ ei lâk piak sau sau ding in ka hun chial baw k a hi.

Kikhawmpi palaite â ding in taksa lam nêk leh châk dingte guanggal a hia, taksa lam hisêllona neite â ding a le medical department siam a hi baw k hi. Zintunna ding kitup tak ah siam fel a hia, a hung giaklût ding a tam laisia, la zâlû zo in, vangphatna gêl in kipâk zaw

ding ka hui a, a vaima lam ah
kikiatsak thei vâng leu hin
duthusam a hi.

Gari neu leh Lian ah
kikhawmpi hungte â ding
in Parking mun siam a hia,
Traffic department-te'n fel
tak in hung buai pi ding a hui.
Chutna ding leh tawivelna
ding haw hung buai pi ding
in Ushering department
guanggal a hia, kisuanglâlo
kei ah ei matphatchuampi
ding in ka hung nê bawh hi.
Zun leh êk kithial nuamte â
ding in guanggalna siam a
hi bawh a, kisuanglalo kei
ah Usherte panpina dawt
mai ding a hi. Thingpi-
tuilum bangtik lai a le mat
ziang thei ding ah guanggal
a hia, kisuanglalo kei ah
mangphachuam ding in ka
hung chial hi.

2. Synod 3 veina: Synod
naupang cha ti thei ding
le i hi nai puau a, Synod
piting tak tak te khantona
ziak, lawtinna diak pî pên
ah muthei chu, Palai-te'n
kikhawmpi a ngaikhawh

ziaku leh vaihawmna nasa
tak ah a ngaipawimaw ziaku
hî in a kilang a. Ziakiakchun,
Synod Kikhawmpi 3-veina
Synod puitute, palai
hisate leh palai têtete
zosia Synod Kikhawmpina
i mawpuaknau hung
ngaikhawh a, hungsupiting
sau sau ding in ka dawisakna
ka hun lân a hi.

3. Synod vaihawmna:

Vaihawmna lam ah tu kum
a thumveina bep tilo in
Synod hotute, committee
chuam chuamte leh palai
vaihawmtute'n Synod piting
ah lânkai theina ding ah
mani pawimawna chiat
ah pan i lâk ua, lunggêlte
sêng in i Synod taksa leh
thagau ah i khan let theina
ding in vaihawmnate nei
thei leu hin ka nuam ma
ma a hi. Synod piting ah
lânkai theina ding ah chun -
Presbytery siambe i mamaw
ta. Ziakiakchun hotute'n bial
siamlem a h'em, a hun siam
hun ua le, lungawilo leh um
ûtna chuam nei bîk umlo
a, thumang tak leh daw zo

HINNA VÂK

tak mai ah Synod hotute vaihâwmna hiat thiampi zêl ah malâk thei zel i kinepna a hia, i kizilsakna leh i chia dan a hi bawk hi. Zia gual lunggel leh vaihawmna bep ah chun malam suan thei ding i hiu a, Presbyterian-te chu “Hotute’n pha a sak nâku leh a phai” ti sekte i hi ziakun, zia gual ah chu um thei chiat ding in ka hung chial bawk hi.

4. Presbytery siambe ding:

Synod Kikhawmpi mathîlna ah presbytery siambe ding hi pawimaw ka sa a hi. PCI Assembly in le Synod piting ah ei siam theilonau khat a hi. Vaihawm palaiten Presbytery um belap theina ding ah mathîl i neu pawimawding in ka gingchai. Zia chu tawh kitawn in Synod hotuten presbytery pakhat/pani a h’em siambe theina ding malâkna hung nei thei leu i duthusam a hi. Lamka se leh tuam vêl hi a lawm ah i chênna a hi ziak in presbytery pani hi presbytery pathum in

kikhen thei leh ti bang mathîl hawi tak hi ding in ka gingchai. Chun, i Mother Synod, Mizoram Synod in ram pawn presbytery a nei gual hin ei un le Gam Pâm Presbytery siam dân kingaitua thei leh kochuam â ding ah mathîl hawi tak leh phachuam hi ding in ka gingchai.

5. Pastor Bial siambe hi leh:

Presbytery i siam theina ding ah chun Lamka kîm leh kiang ah Pastor Bial lian deu deute hile bial khat leh ni in kisiam be thei leh mathîl hawi tak hi ding in ka gêl a, tekhninâ’n New Lamka Pastor Bial, S. Munnuam Pastor Bial leh Mata Pastor Bial ah pat hin Bial pani bang kisiam be thei leh hawi ma ma ding a hia, a sung ah Bial hotute leh Pastor umte’n i malâknau a hi ngei ka kinêm hi. Lamka North Presbytery huamsung lam a hileh chu gamsung buai ziak in malâkna tak tak um thei ding in gingchat a um pua, a hinla, a mun ah

umten i Synod leh kochuam khantona ding ah mathîl hawi tak a nei ngeiu ka kinêm hi.

IV. Thukhakna: Kochuam neitu chu Jesu Khrista a hia, nang leh kei hih a kochuam in Jesu Khrista lungtup a sukpitinna ding ah matchak mai i hiu. Nang leh kei in sem peilo le hinle Lalpa'n a nasemtu ding a kivât pua, tulaitak i dinmun ah i sepnau hile ama Khrista Hepina ziak bep ah sem thei i hiu. Ziaziakchun, kisanpi ding bangma i nei pua, Khrista Hepina beplo ngal tawh nasemtulo ngal chu Kochuam nasemtu tâk tak tak kuama i

umlo'u a hi. Syndo kikhawmpi 3-veina mang pan ding bep i hiu a, vaihawm palaite zosian khang sawn sawnte tiang thîl zing kawm in vaihawmna pang thei leu hin ût a um tak zet a, i synod khantona ding leh Lalpa Pathian belâmte khan zelna ding leh ama Jesu Khrista lopina a chan theina ding ah vaihawmtu palai hi thei chiat ding in Synod Kikhawmpi thumveina Chibai ka hung buk a, Kikhawmpi mathîl ka hung zik a hi. Mâwltak ah Synod Kikhawmpi mathîl thupi mang ah ngaidân leh dawidân ka hun zikte hi Lalpa'n simtute zosia malsawm ta hen. Amen!

THAGAU LAM KHANNATE

- Nisin ama hun dawi gual ah matthei hi ding in kilân zing sek in (Rom 12:1-2)
- Nisin in hunbi nei in kilân zing sek in.
- Kâlsin in lekhabu hawi leh hisel pakhat bék sim sek in.
- La hatlonate kihawl dawk inla, Pathian Thagau panpina dawn zing sek in.
- Bible ah mi lopite haw hinkhua kizil zing sek in.
- La dinmun kha nang leh nang kipatep inla, kienchian zel sek in.
- Thagau lam hiselna ding in Lal Jesu kiang in kitulut zing sek in.

~ Ted Engstorm

“NGAIDAMNA”

~ Upa ST Damlian Vaiphei
Pillangkata Presbyterian Kochuam

Ki daw zo tua chiat in, kua’nle mi chung ah thubuai nei taleu chin, kingaidam tua unla; Lalpa’n a ngaidam gual in kingaidam tau in. (Kolossa 3:13)

Ngaidamna hi gingtute a ding ah thil pawimaw pen khat chu a hi, ngaidamna umlo in gingtu hina chu a bukimlo a hi. Ngaidamna hi gingtute chiapilo theilo ahi zia in Satan in vâng a haw ma ma a hi. Ngaidamna umlo ah gingtu diktak kahi ti chu zuau gen a hi.

Israel mi Khristian ginna taksang mama, Holland gam ah Lal nasemtu (Belâmpu) Dr. Capadose chun Khristian a hi masang ua a pute ni ki hepi mama (Joseph leh Issac) te thusim khat ala gen in, a pu (Grandfather) hin Suapi pawsal khat bep a nei in a hepi mama hi. Ziltawpni khat hi a suapi Isaac tawh kiho khial zia in lungna tak in In a hung kile tan, nisa tumkua’n ahi ta, Sabbath mei vak phât ahi ta, a pi chun Joseph sabath mei vak

phât ahi tai tin a hung ko ah, a pu chu hinkhua nuamlo tak in a la umzing in, a pi chun khua thim pai ding ahi ta hi lam a ti vâng in a pu chu ngui chitchet in ala chu zing nalai’ah, tichun a pu chun a lukhuk leh tiengkhat chu chawi in gangtak in a hung taidawk ah, gangtak in mitthi leh naptui pum in a hung tai lut kit tai. Zia chun a pun Rebecca (a pi kiang in) mei vak thei ka hi tai tin a mei chu hoitak in a hung vak tai. Mei a vak zaw phat in a pi kiang ah chun hiti

hin a gen tai, ka suapi Isaac tawh kichamlo ah pauchapna nei ah mei vak ding chu ka gel theilo hial ahi atia. A pi chun ahi leh bang atia gang tak ah hung kile kit ziang la hem? tia a dawt leh a pu'n a ziak chu kei gual ah Isaac (ka naupa) ngeile sabbath chu kei tawh kichamlo ah pauchapna leh mei vak chu a la bawl theilo a hi tan, ngaidam dawn ding ah a hung leh lampi ah kakisutuau in ama le kei kiang lam zuan ah hung tai a hin, kei le ama kiang lam zuan ah tai ka hin, ka kimu tuau in kaki kawi un kakap den tau hi. Ziaziak chun hung kile vak ka hi a tia.

Zia thusim apat hiat thei chu gingtute hin bangkim i bawl zosia ah ngaidamna nei masak a kûl dan i muthei a hi, tulai gingtu tamtak in ngaidamna chawpkhup in Pathian nasepna lopi tak tak sem in i kigel maithei hi, hinla gingtu a ding ah nasep patna chu ngaidamna hi a hi. Ngaidamna neilo gingtu i tam bek ziak un chanchinpha hi a masawn di gual in masawn theilo ahi tai ti le hin kigen khial puan'a.

Gingtu i hinau kum 100 val ta tuchan ah gingtu um dan ding tawh kituak ah umlo Khristian tampi i um nalai hi. Lal Jesu'n i thilpiak masang un suapi tawh kicham masa ding in ei hil hi. *"Mâichâm ah la thilpiak la kawilai ngei ah, la unau in la chung ah lung hi'lona a nei la hiatdaw ahi leh, zia mâichâm ma-ang a chun, la thilpiak chu nusia'n la, chiakit inla la unau va kichampi masa phawt in, zia zaw chu leh hung inla, la thilpiak chu hung la'n in".* (Mathai 5:23,24)

Ka lungthim khawi mama ziang kum 2023 May 3 ni khan Meitei ten gal ei bawl khum ua, muntin in, i tai zâk ua, ginchaklo na gam muntin in i um thâng tau a, Guwahati ah um Catholic Fathers-te Manipur gam buai ziak ah panlak di dan a gen khâwm nau in Pastor Thangminlun tawh kava pang ua, mak a sak mamau chu tu malam ah eimi leh eimi, Khristian leh Khristian ki gâl ah kitha, kimat thu lungdawn um tak in a holim ua, Gingtu leh Gingtu kido ti chu lungkham um tak

HINNA VÂK

vâng chu ahi tai, Tu'n le dogal melma i nei zinglai in ei leh ei kitha, kimat bei diaklo, zia chula Bible sim zing Pathian thu tângkopi zing kihi tho, igam hin ngaidamna chu a mamaw takzet hi. Gingtu khat kihi ngal kum bangzat i suapi kingaidam theilo, ngaidam ding lung le kigel thei nailo, Lal Jesu tawh ngaidam dawn ding ah hung kalsuan ding hi leh le ngaidam lo ding ah kitiam bang gingtu Kochuam Upa, Pastor ki um nalai ahi chun kingaitua hun chu a hitai. I unau i suapi thil hikhial i ngaidamte chung ah kisatheitak in i vak pau sek a, Ningkum a le kala ngaidam la hi tai la hung bawl kit leh ngaidam talo ding ka hi tia chapo tak ah mi i ngaidam sun sunte kiang ah i vak gen nalai sek ah, kum bangzat masang ah i ngaidamte bang ngaidamlo in i kawit ta a hi. bang gual in bang zat hita leh ngaidam zo ding ah Lalpa'n ei ti a hi. *Peter chun a kiang in a hung ah, aleh Lalpa, ka suapi ka chung ah bangzat vei hi khial leh ka ngaidam diam? Sagivei tiang in ahi*

diam atia. Jesu'n a kiang'in sagivei katipuai sagivei mun sawmsagi tiang'in ka hun ti ahi. (Mathai 18:21,22)

Paul chun "Lungnau inla, ahin, gilo kiu in; la lungnatnau chu nisa'n tumpi ki'hen"atia (Eph. 4:26). Ei chu i suapi chung ah lungnatna bang i nei inle kumtuang ah lungdam talo ding ah kitiam zawt zawt ziang, ka damsung in lungdam puangka tite paukam bang hangsan tak in i mang ziang sek a hi, Lal Jesu Khrista chun Mitin in la lunggil tak ua la suapiteu la ngaidamlo ua leh ka Pa vân ah um inle zia gualmachun la chung un hun bawl ding ahi atia. (Mattai 18:35). Ngaidamlo kiti hi Pathian thupiak zuilona ahi. Ngaidamna hi chu thil bai vang ahi puai, hinla Lal Jesu'n ei haw gitlona zia ah ei hung tan dawk hi ti he te ding in vang thil haksa ahi puai. Mi i ngaidam theilo chun Lalpa'n ei ngaidamna thu hechianlo i hi ding a hi.

Ngaidam hi puakgik paithakna a hi: Lekha ziktu khat in *"ka lung suna mama mi*

khat ka ngaidam chun ama a ding ah thilpha bawl kahi zaw puan, kei ka suangkul tânna apat kithâdaw k ka hi zawi" ala ti a hi, Ngaidam zolou kiti hi puakgik pua zing kiti na a hi. Zia hi mipha te puak gik natna khat in a um daw k tai, a zia chu miphalo ei bawlsia haw chun a gel phaklo maithei uh ahi tai, hinla mipha kibawlsia (victim) miten a hemil thei ngai puau hi. Lal Jesu'n pauchap ding dan ei hil nau a chun **ka chung'ua thil hi khial te ka ngaidam gual un nang inle**

ka thil hikhial teu ei ngaidam in ti a hi, i gitlo zia k ua Kraws ah a hung thi i bat zosiau ei ngaidam ahi tai, ziaziak chun mi dang gitlona le i ngaidam diu tina a hi, zia ngaidamna chu i nei masang sia puakgik chu i puak zing ahi ti hiat a ngai hi. Ngaidam theina hi mihiam in kineilo ahi'n, hinla Jesu taksang zosia'n Pathian kiang ah i dawt chun Pathian hepina sangpen chun zia ngaidam theina chu ei pia ding a hi.

Simtu zosia Lalpa'n malzawl ta hen.

Zia thilte hi la ngaitua ngai em?

- ▶ Khawvel gitlona sang in Pathian phatna a hat zawi.
- ▶ Hepina Tuipi hi gitlona tuipi sang in a lian zawi.
- ▶ Gitlona a punna mun ah Lungsiatna a pung hi.
- ▶ Thina sang in Pathian a hat zawi.
- ▶ "Ngaidam" hi le thawk sang in a bailam zawi.
- ▶ Jesu hi Hukdampa lopi chu a hi.
- ▶ Lal Jesu'n ama dawite a hukdam nuam zing hi.
- ▶ Lal Jesu hungkitna ding thu ahin kinepna thu zosia chu a kichûn khawm suak a hi.
- ▶ Phatna hi Gitlona sang in a hat zawi.
- ▶ Ngaidamna hi Gawtna sang in a hat zawi.

~ Hinna Vâk July & August 2024 issue

“GINGTU NO. 2 LA HI EM?”

~ Pro. Pastor Lalgouliau
New Lamka Pastor Bial

Sawlchak Paul in Rome khawpi gingtute a tilkhona chun, *“Zia khawvel dan gual ah hin um kiu inla, Pathian dawi gual, a pha leh pawmtak leh a bukim chu la hettheina ding un, la lungthim’u siamthak ah um in, hung danglam zaw tau in,”* tin a gen hi. (Rom. 12:2) Tulai ahin gingtute hi khawvel dan gual ah um tamtak a ki-um ta, gingu kahi kiti maleu, gingu diktak hilo, gingu No. 2 i suak zo tau a hi. Gingu No. 2 chu vak genchian masai tiu.

Gari No. 2 leh Gingu No. 2:

Tulai ah i gam ua thil phalo tak, ahinla uang tak mai ah kizuak chu gari No. 2 a hi. Gari hawi tak tak man tawmcha kizuak sek, a gari lekha umlo, siamkawm thei ti’n a zuak sek ua, khenkhat chun a chawu ah, a lekha siam le a um ua, a siamlo le a tam ua, license plate le umlo in tia chun mang ziang le a kitam a hi. Zia gual gari No. 2 kitite hi guchaten a guk’u kizuak, ahiloleh, a

neitute’n mantawm cha a zuak ua, a kigumang a hi ti’n report a bawl ua, zia chun insurance sum a kilak sek’u a hi. Zia zia a chun, gari No. 2 hi register diktak kibawl theilo a hia, a lekha bawlsakte le diklo tak ah kibawlsak tina a hi. Zia gual gari No. 2 hi mi nautang in le a kimang tam ma ma, gamsung buainung vang a hin police te’n gari lekha a checklo zia’un mi tamtak in lekha um leh umlo

le ngaisaklo in, zalen tak mai in a mang ngam ui.

Gingtute khenkhat hile gari no. 2 gual ahin, Pathian cha i hinau a kipat hin Setan in ei gumang ah, zia tak a chung gari *original* gual ah tai vel thei, mi chia chiana le chiathei, kikhawm le kikhawm thei, Pathian nasem a le kingai tho, ahinla a hinna diktak a chun Pathian thu zuidik talote hi gingu No. 2 a hi sek ui. Gingu No. 2 te hiat theina chu zia gual hi a hi:

1. Sum leh Pai du-amna:

Sum leh pai du-amna zia a hin i gamsung khantona um theilo tile hinle kigenkhiallo ding a hi. Sum leh pai diktak in kimang hile government apat genthei haksa panpina dingte, gam leh gua siamphatna ding, lampi siamna ding, lei siamna ding, In sakna ding, nek leh chak *ration* hawp ding tiang a hin, i gamsung hi kiningting zo ding in gingchat a um hi. Himaleh, mi khenkhat du-

amna leh nekgukna zia a in i gam'u hi a masawn theilo a hi. Sum leh pai du-amna zia a in khamthei zawk le khaw a kisapua, mi thisa pension lak ziang le khaw a kisa puai.

Tu masang deu khan i gamsung ahin *lottery* i la buai pi nasaten ua, zia zaw a chun *network* bawl a hung kithang kit ah. Tulai a hin le sum veipung ding dan zat chuam chuam hi a um kit hi. Kochuam ah kimang tamtakte hinle gunchu tak ah na sep ah, i mu kham kham ah lungawina kineilo in, a lawk leh a tamzaw banggual in a kimu thei diam ti hin ei chawkbuai sek a hi. Diktak ah sum veipun chu a sia a hi pua, ahinla, khenkhat chun a khêl a val hawl na mi zuau thep le khawksalo ki-um sek a hi. Zia gual ah sum leh pai du-amna leh diklo tak ah sum hawl na kichiapi hi gingu No. 2 i hinau pakhat a hi. Pathian thu'n "La hindan'u chu êna

HINNA VÂK

panglo hihen; la nei dan dan un lungawi unla...” (Heb. 13:5) tin ei gen a hi.

2. Vaihawmna diklo chiapi:

Manipur state nuai ah nasepna a kilak phat tak leh a tamzaw hi sum leh pai ah chawktaw a ngai sek hi. Zia gual ah sepna mute chun ginumna, tawmngaina leh felna a nei puau a, sum neklona ding in nasem nuam le a um seklo’u a hi. Ki dawisakna (*nepotism*), nekgukna (*corruption*) leh sum ah kithawidamna (*bribery*) hin nasatak in i gamsung khanto theilona leh mipi changkang theilona a siam daw k a hi. Mipite’n le a dik leh a pha hawl zawlo in, vaihawmna diklo chiapi dan i thiam ua. Office ah nasemte sum i piau ah, diklo tak in lekha i bawlsak nuam sek’ui. Officer kihetpi i nei ua leh a bawlthei pen gual in i kingai ua, a lian leh a lalte chu Pathian gual in i jau ah, migenthei leh mimawlte chu i kawiniam

ma mau hi.

Tulai hun a hin NREGS (Job Card) ah sum i mu dan teu, Voter list kisiam dan te, Khawthak thak i siam dan teu ziak a hin nasatak in midangten le ei gen siau ah, Meiteite vang in gamdangmi hunglut thak tamtak gual in ei gen ui. Zia haw hi Gingtu No. 2 i hinau kilatna a hung hisek hi. Jawlnei Amos chun “vaihawmna dik tui gual in luansak un” (Amos 5:24) a la ti gual in i gamsung hin vaihawmna dik a mamaw takzet hi.

3. Pathian thu sang ah nunnawp:

Tulai hin i gamsung ah nunnawp bawlina mun (*resort, park, restaurant, café, turf ground*) tite hi a hung tam ma ma ziang ta. Zia mun ah va chia ding, nunnawp mat ding leh lawi leh pai tawh kipawlkhawm ah lim tak ah um ding hi khangthak tamtakte thatnawpna bep hilo in, nu

leh pate le a thanuam ua. Sungkuan ah Biak-In kai kim theilo te le zia munte ahin sungkuan kim in nunnawp a va mang sek'ui. Zia munte hi nungak leh tangval tatsualna mun a hinuam in, chuleh khamthei bawl patna mun le a hinuam sek hi. I gamsung i et chun mi hausa khenkhat a um lai in, a tamzaw genthei leh haksa tak ah nek hawl a kihin, nunnawp lam a hin sum leh pai tamtak takte i seng ua, zia hin Pathian ei naisak sang in, Pathian ei gamlat sak sek zawkna tampi a muthei a hi. Limtak ah, lungthim dawidan ah chia ding chu a nuam in, ahinla a tawp leh Pathian vaihawmna hung tung ding a hi (Tgt. 11:9). Nunnawp bawl na mun ngaina ma ma ziang, Biak-In kikhawpte, lâ zil ding tite, seminar ding tite, Pathian thu kipawlkhawmna lam ah thatnawpna neilo chu gingtu No. 2 hina sulangtu pakhat a hi kit hi.

4. Thagau lam sang ah taksa lam lawtinna ngaikhawk:

Tulai ahin nu leh pate'n chate lawtinna ding ngaikhawk in school le a hawitheipente kaisak in, tuition te a laksak ua, chate lekha sim ding leh examna sangtak ah a pass theina ding ua hin pan nasatak in a lau ti hi a muthei hi. Lekha simna ding leh gamchuam ah nasepna hawl na ding a chun sum leh pai leh tha leh zungte a seng ngap ua, ahinla, thagau lam hukdamna ding buaipilo tamtak a um sek ui. Zia ziaak hin, taksa thil ah lawting officer tamtak i nei sek ua, ahinla thagau mangthai dingte, kochuam ngainalo, gam leh nam siamphat sang ah ama nawpsakna ding bep ngaitua a kitam hi. Kol. 3:2 chun chunglam ah thil umte ah lungthim ngah ding in ei ziltil a hi, ahinla gingtu No. 2 te chun chunglam ah umte sang in khawvel thil hi a ngaikhawk zaw sek ui.

HINNA VÂK

5. Kichenna diklo chiapi:

Tulai hin Kochuam danlo gual ah nungak leh tangval kicheng hi a ngaina gual ah i kawi ua, a kitaipite i kipakpiu ah, kochuam ah lubawk khenkhat le pupa chawndan sukpitinna ding in becha tucha in i pang ua, zia gual ah kichenna diklo i lawp'u hi gingtute bawl ding chu a hi puai. Biak-In hawnglo ah kitaipi ah kichengte hi sual ah um a hui a, nupan a le simlo ding a hui ti hi hiat ding in a pawimaw hi. Zia gual ah dan diklo tak ah kichenna hi a phatlo dan leh a dawumlo dan hi kochuamte'n i hiat ding'un a pawimaw khawp mai hi. Nu leh pa khenkhat in a chateu le Biak-In hawng ah kicheng sang in a kitaipi dingu phasa zaw gual in a hung kilang sek a hi. Kichenna hi a thiangtho in a ja-um a hi (Heb. 13:4), ziaziak a chun danlo gual ah kitaipite hi Bible in tatsualna leh angkawmna a ti tawh

kibang a hi. Kochuamte thunun ding le kingainep ta, thunun hikhak ding chu zachatna leh mualphona le kingai thei talo i hui chun gingtu diktak hitalo, gingtu No. 2 i hui tina a hi.

Thukhakna:

Gari no. 2 chu a neitu diktak in a matsua gual a hi ta, guchate hem, diklo tak ah neitute'n amau nawp nawpna a mat thei'u a hung suak tai. Zia gual a chun gingtute hile Pathian chate i hinau apat hin sual ah kipuklut in, Pathian in ei mangthei talo in, sual in ei mangcha zaw sek ta a hi. A min ah gingtu kiti ngal ahinla, gingtu hinkhua leh Pathian thupiak gual ah hinkhua mang talo tamtak a ki-um ta a hi. Gingtu hileh gari hileh, No. 2 a tam takluat ziaak a hin thagau mangthai ding a kitam in, i gamsung leh i namsung leh i vengsung tiang in taksa leh thagau ah masawmna leh khantona a um theilo a hi. Gingtute a neitu diktak kiang ah kilekit ah, No. 1 hithei chiat ding in Pathian nai thak kit hitiu.

“KIPAK PUM AH LAL NASEP”

(Sam 100:2)

~ Pro. Pastor S. Lunmuanthang
Lamka Pastor Bial

Thumapui: Sam 100 na phuaktu hin ama hinkhua a thil tuak te leh Pathian tawh a kitimat na tiang ua, Pathian a muchian na tiang tiang apat zia La hi a hung phuak a hi. Midang chialna La a hipua, a kilawm mai a bawl ding a ti le a hidiak pua. Ama tuaksa leh a hiatchian sa midang inle bawl ngei ngei ding a thilpha ahi a ti zia in thupiak gual in mi zosian kipak pum a Lalna sep ding ahi ati'i. Ala phuak dan apat hin a phuaktu pa hi ahun lai a chun mi thilbawl theitak leh thuneitak hin a ti le a hiat thei hi.

Kipak pum a Lal nasep ti hin gendan chuam leh tup chuam chuam a nei thei hi, tuni hin lam thum in gen ding ihui.

1) Gingtu hinkhua Lal Jesu batna lam in a khan sak hi:

Gingtute hi Pathian in i hatlonau leh i basap nalaiu ei hechian ma ma hi. I hatlo nau apat suk hat ding chu Pathian thiltup a hi, Lal Jesu batna lam ah i khan theina ding un Kipak pum a Lal na i sep ding a hi. Ziagual ah i bawl ham ham nau hi'n Chapona apat kingainiam

na lam in ei pui sek in, Kipak pum a lal nasep na in a kentel chu mani hina zosia leh i thatnawpna tiang khel lam ah bawl ham ham hi a hi.

Dawzawna ei piaia, Lal nasep na hin hun tamzaw ahin sawiselna leh gensiatna'n a maitua ngal sek hi. I ginchaklo na lam

HINNA VÂK

leh i mi muan ma ma te
apat ziagual thil ituak tak
vang leh mihing lungthim
hin dawzaw a hak diak sek
hi. Ziate thuak zolo ah i
um khak tak leh maban Lal
nasep chu a hak diak sek hi
in a kilang hi. Ei mani nawp
sakna leh mi gen phatna
tiang bep a nasep na hin
kipak na bukim a tut ngai
puai. Haksatna leh gensiat
na kal ah le mani hina hemil
khawp hial ah Lal nasem
ham ham te chun Lal Jesu
gual ah dawzawna a nei un
zia chun kipak pum ah Lal
nasep ga miten a muthei
sek ui.

2) Thu hiatpitu det in ei siam hi:

Lal nasep hi a tak ah Lal
Jesu thuhiatpitu i hina
taklat na pha pen te lak
a khat a hi. Ama Lal Jesu
bawl gual ngei ah Midangte
hepi na nei kawm a a na i
sepna hin ama thu hiatpitu
det i hina a latsak hi. I nisin
hinkhuau ah, i nekhawl na
kawng zosiau ah, i tawi leh

chan, paukam mat danu
leh i lungput tiang un thu
hiatpitu dik i hina mite'n ei
thil zing ui.

3) Kipakthu gen na a hi:

Min i chung ah thilpha ei
bawl piak leh a h'em thil
pha ei piak leh a dawngtu a
din a kipak a um ma ma hi,
a thil ei piak kha ei petun
ama nei lak ah a h'em ama
hithei lak a lul pen ahi ti i
hiat vang chun dawngtu
kipak na chu a sang diak hi.
Zia gual ma chun thilpiak
dawngtu chun a kipak
ma ma ziak in, thil petu
pa kiang a chun kipakthu
genna'n ama thei na leh
hatna khel le a lân ngam
sek hi. Mihingte mangthai
ah um ding lai hepi na ziak
bep a Lal Jesu'n ei hukdam
na hi, Mihing ten i bawl
thei sun uchu Kipak pum a
na sep bep hi a hi.

Kipak pum ah Lal Nasep ti
hi a bul pat til leh lim na ahem
halna boruak i chan hun a din
vang a nawp ma ma le ahi
mai thei hi. Hun hung chia

zel ah boruak chuam chuam
tele a hung dai hiai hiai ah, i
Pathian nasep na miten le ei
tuipi tak lo nung ua, eima ngei
inle kul leh pawimaw chuam
chuam i hung nei ah, bangkim
hi ngainep nawpna in ahung
lua hun ah pei lo kawm kawm
leh thanawp na a tawm ma
ma hun a le Lalpa Nasep na
bawl ham ham hi gingu hin

ding dan tak chu a hi. Pathian
in a misiamte mangthai mai
ding te a hepina zia k liau liau
ah a chapa changkhat neisun
Jesu ei piak na, hechian tute a
din vang kipak pum ah Lalna
sep ding hi i bawl makmawu
ahin, ziagual mite chun bang
gual beidawn um leh lungkiat
na un inle Kipak pum in Lalna
chu a sem thei sek ui.

MIDANG CHUNG AH PHATNA

Sumkawlvei mi khat hin khatvei chu
a zi kiang in, “Tunitak chu gamdangmi,
mi pawimaw tak khat anneki ka nuam
in, An tui tak mai la la guanggal thei
diam?” a tia. A zi chun a huphul ten
ziang ah, a naunawn ma mau a, a
chate pathum sikul kai buai pi a ngai
ah, sikul kai thei nailo le pakhat a nei
nalai ah. Zia gual dinmun ahi zinglai
ah melhiatlo mi pawimaw tak hi nalai
anneki ding chu a huphul ma ma
ziang a. Ahinla, a pawsal kiang a chun,
“ka theitawp in a la kisingsang ka”, tin
a lemsak thu chu a hilla.

Buai tak mai kawm a chun a
kisingsa ta, nitak An chu lim tak in
a nekhawm tau a. A malzin pau chu
Spain gam ah sorkal mi pawimaw tak
mai a hia, anneki ding a siamtui dan uh
leh sungkuan lim tak mai tawh nitak

An a nek chu nawp a sak danthu leh a
kipak dan thu chu a malzin pau chun a
In neite kiang ah chun a gen ziang hi.

Zia nung kum bang ahem zat zaw
a chun zia mite gualpha ma ma khat
chu spain gama Missionary ding in a
kuan ah, sorkal dan lampang tawh
kisai in bang hem khat buaina a tuak
kha ziang ta'n. Zia thu chu Spain pa
chun a la hia kha ta, tuma lam ah a An
va nekna te gualpha tak ahi thu le a
hia ta'n a haksat nate chu a suk navak
piak ta a hi.

Buai mama ziang la hi thei hi ahinla,
midangte a ding in hun pia ham ham
sek in, zia thil chun mi dange tawh la
kikal un ga dawu umtak sua ngei ding
a hi.

~ Courtesy: Agape

**“ZU (WINE) MIHINGTE MELMA
(ENEMY) LIANPEN PEN A HI”
(Galatia 6:7-8)**

~ *Upa Th. Lalkhomang
Lamka Kochuam*

Zu hi kuama a dia a phatna umlo a hi. Buaina leh vangsiatna tuntutu a hi. Mihiamte gâl lianpen khat a hi.

1. Zu hina leh a nasepte:

Zu (*Alcohol*) hi bang a hi em? Zu lak ah chemical compound khat a thian ah thianga i hâl leh kuangthei natna hik le that thei ding khawp ah hat a kiti (*Etthyl Alcohol*). Zia chu zu ah khamtheina umsaktu a hi. A hât dan chu neu chale (0.06%) thisan ah a lut leh thuak khawhetna a subuai a, khambuaina leh muatna chanpha a tunsak thei ah, zia chu a dawnphatu leh a thisan ua lut pai ngal, thisan in hiplut ngal, taksa lutzat 20% ahia, thisan ah lut ahi leh 70% a hi.

Tichun, thisan ah a tai tawl tawl ah, zia sung a

chun Thin (*Liver*) a sukek ah, Carbondioxide (Huithianglo) leh tuihu (vapour) a suak a, a hung kekzak phat leh tha nei in a hat ma ma hi. Zia neukhat Thin lam ah chialote khawsaul leh zun leh kam lam ah a hung pawt ah ziaziak chun zu dawnte chu zugim nam the thu ahiu. Zia chu ahiziak in zu dawnte chu Thin (*Liver*) natna, TB (*Tuberculosis*) leh a dang dang natna a vei sek ui.

Chuleh, Alcohol ah um Chemical khat hi thilmuat thei dingte vengbittu ah mat a hi. Thil tâk (*Solid*) sukbuangna mat ahikit hi. Zu hat chu Rom, Brandy leh Whisky ah (6-90%)

a pang hi. Khatvei dawn ding Thikkhe dim ni (2) khel hilo ding lai a thawl ah thawl thaw in i dawn phat leh i siatpi lo theilo a hi.

2. Bible in Zu chungchang a gendan:

Mi kimkhat ten zudawn leh a zuak genphat a gua ham ham ua, Bible in zu dawn a kham sam ahem? Paul inle Timothi kiang ah “La gilpi hatlo ziak in zu neukhat khat dawn sek in ti in a gen bana a lut lam in bangma a susia pua, a pawt lam in mi a subuak ah, a lut lam ahileh a thiang ahi tin paulap a siam ui ti a hi. Ahiziak in Bible thute hi a zik hun leh a tup a ngim hechianlo ah, mitthum sial khau tuk ah i tuk leh hikhial ding ihu.

3. Thuthung Lui gendan leh a dawnte:

Hebrai pau in Zu hi “Yayin” a hi. Thuthung Lui ah zu hi 140 vei a chuang hi. Zudawn ziak a siatna a tuak teu gen hitiu.

1) Noah: Noah in zu a dawn ziak in a kham ah bangma helo

in ngawnchang in a lum a, a chapa Ham a pa mualphona puan a khulo Suak leh Sal ding in hanse law ahi tai (Gen. 19:21). Ama zukham ziak in a chapa vangsiatna, suak leh sal hina a law hi. Ama bep hilo in a suan leh a pak chan phan vangsiatna a chang ui. Ziagual a chun tulai Pate/ Insung mite zudawn ziak in i insung i gamsung niamkiakna a tun law hi.

2) Lot: Lot in le zu a dawnkham ziak in ama chanu teni tawh lumkhawm in cha a nei pi a hi. Ziakipat in zudawn zukham ziak in angkawmna, siatna tawpkhawk a tun khawlaw’i ti i muthei hi.

3) Nabal: Nabal hi zu a kham ziak in ankuang luina a mualpho a, a lungthim chiantak ah azi’n (Abigail) ahil leh a lungphut a chawlta, suang gual a hung chak ziang ta ni sawm (10) nung in Lalpa’n a hinna a la tai (1 Sam. 25:36-38)

Zudawn hi damsung leh thini manni chan ah mualphona

HINNA VÂK

tuntu a hidan a kilang chiang ma ma hi.

4) Leng Elah: Leng Elah zu kham ah a umlai in a suakpa Zimri in a that ta a hi (1 Lengte 16:8-10). Zia kipat ahin zu dawn zia in tual thana tuntu a hidan a kilang hi.

5) Suria Lal Benhadad: Ama leh a pa'n khawmpi Leng 32 te tawh a puanbuk ah zu a dawn khawm lai tak un Israel sepaite va do in tamtak that in, a va zo tau hi (1 Lengte 20:16-21). Zia a kipat in zudawn chu guallelna, gam leh lei châna a hidan a kilang chiang khawp mai hi.

6) Lal Ahasura: Ama hinle zu a dawn kham zia in a zi melhawi ma ma, a hepitak Lalnu Vasti a khenlaw a hi. Ziagual deu in tulai in zudawn leh sa nek zia in nupan tamtak a kikhen khawlaw ua, naupang tamtak nauchaga a suakta a hi.

4. Thuthung Thak gendan:

Bible in a diak in tulai a i zu teu hi dawn ding ahi tia a gen

na le i mudiak puau hi. Lal Jesu'n le Lalpa nitak Ankuang a la bawl lai in a nungzuiten a hetkhial ding uh a lau zia in "wine/zu" ti kampau a mang puai "Grape tui" ti a mang zaw a hi. Ziahin, Jesu Khrista in khamthei leh misusiathei ding 'Zu' a dawn ding uh a phallo ban ah ama ngei inle a dawn puai ti a lang chiang ma ma hi. (Mat. 26:29 ; Mk. 14:25; Lk. 22:18)

Zialo a chun, "Zukham in um ki un" ti thupiak khautak mai i mu a hi (Eph. 5:18). Zia hin wine/zu kham ti thumal hi Greek pau in 'Methusko' ahia, zukham a kipat tina a hi. Zukham kipan vanglak ki un, zia thupiak in a gen nuam ahileh zu khamlo ding ti sang in zudawn kipat vanglaklo ding tina a hi. A zia ahileh min zu a dawn vanglak uleh 1 vei 2 vei in a hai thei sek puau hi, a zawngsak ua, zu in amau taksa ah na a hun sep phat leh a dawnte a le nek ta a hi.

Zialo a chun Jesu'n Kana khua tui wine a suaksak penle

khamthei leh mi susethei zu ahi ginchak a um puai. Aziak ahileh Jesu'n le ziagual zu a dawn ngailo a hi. Zia ban a chun Bible in zu dawnte dinmun ziagual in a la gen hi.

- 1) Zu dawn chu mite nuisan leh simmaw channa a hi (Zu dawn zia in bang zatvei mite nuizatbuk leh simmaw in la um kha ta'm?)
- 2) Zu dawnte hau ngai puana. Nu zudawn zia in bangzat vei la mualpho ta em?
- 3) Zu dawn leh sa he mi chu hung zawng ding ahiu, imut vuanna chun puansia hun silsak ding a hi.
- 4) Kuate ahi em a chung gik zing sek? Kuate ahi em lungngai sek? Kuate ahi em kina zing sek? Kuate ahi em thubuai nei sek? Kuate ahi em a zia umlo ah beliampu sek? Kuate ahi em mitsan kei kui ah um sek? Ziate haw chu zu mun ah châmdente ahiu, a tawp leh gul gual in mi a chu sek

hi.

- 5) Zu dawnte chung a gik hi. Zu du zia in nekguk leh lakgukna a piang ah, migilo thiam chansak a, midik thiamlo chansak tute chung a gik hi (Isai 5:20-23)
- 6) A lau um pen ahi leh zu dawn chu vangam lutlona a hi (1 Kor. 6:9-10) chuleh Bible in zu dawn maimai khâmlo in zumun nawpsak na le a khâm (phallo) a hi (Gal. 5:21)

5. Zu hi mihingte siatna bulpi a hi:

- 1) Thuak ahin cell 14,00,00,00,00,000 ah kipat in 16,00,00,00,00,000 um hin a sutdawk ui. Min zu khatvei thu tamtak a dawn leh a thuak a hetna cell 20,000 vel suksiat hin mithiamten a gen ui. Zia ban a taksa hatlona, mitthimna leh natna chuam chuam a tun thei hi. Mihiam thil hettheinate le a subuai ah, thil hilopipi munate, thilgit chuam chuam hetnate leh dawi leh kauten zia gual

HINNA VÂK

mite chu a ngam thaw'i a kitii.

2) Nu leh Pan hinalam ah zu nasepdan: Min zu a dawn tam phat leh Nu leh Pan hinalam tiang a subuai sek hi. Zia chu cha leh nau neitheilona leh angkawmna a tun thei hi.

3) Thin (Liver) a suksiat thei dan: Mi'n zu a dawn tam phat leh "Hepatic coma" natna a tun hi. Zia hin Thin a siat sak ziak in a natna "Thidang" a um tina a hi. Ziagual a mihiam a um theina ziak Thin cell ten na a sem thei talo a hi. Zia hi zu in Thin a suksiat tak ziak a hi. Thin in Thinkha tui gilpi ah a piak ding zat a pe thei talo a hi. Ziagual ma chun, gilpi apat i taksa a ding ah thilphate Vitamin chuam chuamte le ahi ding bang tak ah a hawm zak thei talo in taksa in nasatak in hatlona a tuak hi. Zia Thin nasepna hi i taksa sunga nasem lak ah a pawimaw pen khat a hi.

4) Zu hin mihing a that tampen a hi: Ziagual a hin zu hin mihing a tha dan a kisui hi. America gam a kumsin in

mi 27,000 a that a hi. Zia chu 100 lak ah 80% hi zu dawn ziak a hi. AIDS natna i lau ma ma lai un AIDS in mi khat a tha phat leh Zu in mihing 10,000 a la that man hi. Ziaban a chun Cancer natna le a huaisia ma ma a, aman mi 10 a tha phat leh zu in mi 20,000 a la that man ta a hi. Ui ngawl in mi khat a pe ziak ah a thi sung in zu in mi 30,000 a thi sak man hi. Ui ngawl chu thapai in a um a, zu zuakte ahau deu deu ui. Natna dalna ding in Doctor thiamten pan nasatak a la zel ua, ahinla a Zu zuakte a pung deu deu ui. Ziaban a, Zudawnte chu, zu in a buaina uh a belap piak to zel a, a sakhau sung ah pat in sum leh pai te a lakpiak ban ah natna huaisiatak a belap piak nalai hi.

5) Zu hi Gam leh Nam buaina tuntun a hi: USA a hin kawng bangkim in zu in a gamu leh a nam uh a suksiat dan suidaw a hi. Kumcheng in USA ah zu ziak in dollar tuk leh dingawn 120 vel matzaw ahi zing hi. Ziagual ah a sênnateu chu zu

ngawlvei etkawl nate, chep leh muam man leh accident chuam chuam ah a sên nateu a hi.

Ziate sang ah huaisia zaw chu, Insung siatnate, kithanate, naupang tamtak chatganate, lungthim natna leh a chuam chuam a tiu hi. Khawvel pumpi zudawn tamna a kisui phat leh USA hi 15 na in a pang phai. Zu dawn tamna pen chu Portugal, France, Italy gamte ahiu hi.

America gam ah mihiam maktaduai 10 val ten zu a dawn ua, Canada gam ah mi 6,00,000 val in zu ngawl a vei ui. Zu dawn zia in kumcheng in mihing 95,000 a thi zing ui. Zu dawn khat zia in mi 4 vel in a buai khawlaw ah, zu kham khat zia in a inkuan piten buaina a tuak khawlaw ui.

Illinoise State USA ah nupan khat a um ua chanu 1 leh chapa 1 a nei ui. Khristmas lai New Mexico a Pa naupa kiang ah chia ding in amau gari in a chiau hi. Lampi pasal khat

in a la kham a, a chuansaku leh a pistol mang in a puikawi (hijack) hi. Tichun a leng un a that ta a hi. Ziazaw a chun mi 2 ma a that kit hi. Police in man in kum 365 sung suangkul tang ding in thu a tan khum a hi. A thu dawtna un, Khristmas lawp ka gua, zu ka va dawn khak zia in bang bawl ka h'em ti le ka helo a hi. Ka manglam a bang hi ati a hi. Zu in a ngaituana a sukchatvai tina a hi. USA gam a numei sual (Rape case) 100 lak ah 85% chu zu zia a hi. Kumsin in Zu zia in Gari Accident tuak mi 40,000-50,000 kikal a um zing hi. Vietnam gal kum 9 sung in USA sepia 43,000 a thiu a hi. Zia hun sung ma chun a gam ua zu zia in mihiam 2,40,000 a thiu a hi.

6) Britain gam ah: Britain gam in le zu zia in buaina tampi a tuak ui. Tu masang kum 10 chiasa ah kipat sut in, zia hun sung in England leh Wales gam ah chun pawsal kum 15-24 kikal ah thi zosiate chu 100 lak ah 50% sang ah tamzawte zu dawn zia a thi ahiu hi.

HINNA VÂK

7) Zu zuak hi Pathian hansia channa a hi: USA a Kennedyte Inkuan in zu a zuak zia un Pathian hansiatna huaise tak a chung ua a tung hi. Joseph Kennedy in President Rossevelt phalna in Scotland apat USA ah zu lalut in a zuak ua, a hung hausa ta ma ma a hi, ahin a inkuan un Pathian dawilo lam nasem ahi zia un, ama leh a chate chung a lawsapna chi chuam chuam a tung hi.

8) Ted Kennedy: Hi La thiam leh feltak a hi. USA President hi ding lunggul zing ziang hina pi in chang zolo in a haisan ta a hi.

John Kennedy: Le USA President hi ding nasa tak in a la tup a, himaleh a guitung masang in a la thi ta a hi.

John F. Kennedy: Hi USA President in hun khatsung a la pang hi. A hun 2 na a le mipiten dawi ma ma na pi'n November 23, 1963 in Texas khawpi ah migilote khut in kaplup in a um ta a hi.

Robert Kennedy: le USA President ding in Primary Election ah tel tin ala hin, teltin tak tak ahi masang in kaplup in a um kit jel hi.

Edward Kennedy: hi USA House a Senator khat a la hia, President dinmun lunggul zing ziang khat a hi. Himaleh ama Private Secretary nu nungak tawh car accident a tuak ua, zia nungak nu chu a thi zia in minsia tak in President ahi theina ding kinepna cheng amansua ta a hi.

A chapa Ted Jr. Kennedy: hile lekha thiamtak leh feltak himaleh Miami Beach ah nungak khat pawngsual (Rape) ah ngaw ah um in nasa tak in a minsia a hi.

Bible in “a invengte kiang ah dawn ding zu pete chung a gik hi” a ti hi amau inkuan chung a chu ti thei a hi. Chuleh Bible in “La tu bang bang at kit ding la hi” (Gal. 6:7)

A tawpna ding in ka Testimony neukhat hun gen leng, Kum 1960 in Old

Lambulane (Imphal) ah ka Pa Paukhokam, Lampu te In ah hun chawmkhat ka la pansa, Class VIII Anand Singh Academy School ah ka la kai hi. Ka nu Dimniang in zu a zuak a, kenle a hetlo kal un, kam ½ ka la tep gusek ah, a tui dan ka hun heman thim ta, ahinla, vangphat um tak in Tribal Boy's Hostel ah seat ka mu tak ziak in ka ki chawnlut tai. Zialai ahin Dumkhu (Cigarette) chep ka la haisan naipua, chuleh hostel dailen buk chu gen ngaina le um talo khawp ah pawlche a hi. I keng tawna di dawk ham ham a hi, i dailen phat leh dumkhu i chep leh a ui gim a ki hepua deu sek ah, cheplo a chu

ekthak haksa ma ma sek a hi.

Ka gen taksa gual in, dum khu chep haisan ding in Lalpa kiang ah kitiam na nei in ka la bawlo pan tai. Lalpa panpina zal in tuni tiang in ka la zo to zel hi. Ziagual ma chun zu (wine) le tuni tiang in ka la nusia to zel hi Lalpa ei panpina zal in, ka lawi leh pai tamtak ten fam ei chansan tau hi. I Pathian thu'n hatna ziak in kum 80 le a hithei hi a ti hi ka la khel to thei nalai hi. Lalpa chu kumtuang in pak leh chawihawi in um zing ziang ta hen (Sam 90:10)

Simtu zosia hat chungnung pa Pathian in hun malzawl chiat ta hen.

Nisin ah Pathian Biak

Banggual in buai ziang le chinle nisin in hun chawmcha sung bek munthip a Pathian pawl sek inla, zia hun a chun nangma kienchian inla, la umdan zosia chu Pathian kiang in kipuung inla, lungthim kihawng tak in ama bia'n la, la haksatna leh la limnate hawle ama hil zel in.

~ **George Herbert**

2024 CKNP Bial Fan

Seminar Thupi : Taksa leh Thagau ah Insung etkawldan
Paper ziktu : Rev. K. Neihsial, *Synod Moderator*

**Phaipheng Pastor Bial
(October 1, 2024)**

Resource Person:

- 1. Pi Lhingkhovah, Chairman
- 2. Pi Niangjoykim, c/m



**Phailianbung Pastor Bial
(October 1, 2024)**

Resource Person:

- 1. Pi Hoipakkim, Gen. Secy.
- 2. Pi Kh. Thianniang, Fin. Secy
- 3. Pi Chinglalven, Ex-Officio



**Leijangphai Pastor Bial
(October 17, 2024)**

Resource Person:

- 1. Pi Nengneithem, Asst. Secy
- 2. Pi Veithiannei, c/m



**D. Khawzim Pastor Bial
(October 18, 2024)**

Resource Person:

- 1. Pi Kh. Thianniang, Fin. Secy
- 2. Pi Niangjoykim, c/m



**Munpi Pastor Bial
(October 18, 2024)**

Resource Person:

1. Pi Lhingkhovah, Chairman
2. Pi Tingzaneth, c/m



**Sugnu Pastor Bial
(October 19, 2024)**

Resource Person:

1. Pi Lhingkhovah, Chairman
2. Pi Damjohny, Treasurer
3. Pi Hauchin, c/m



THU CHU GEN IN, A HUN LEH A HUNLO A LE

Zan khat chu D.L. Moody hi Chicago khawpâm in Inlam zuan in a chia a, lampi a chun mi pakhat bân jâk ah ding zing hi a mu, Moody chun a va nai ah zia pa ko ah khut nga in “*Khristian la hi em*” ti’n a dawng a, zia pa chu a hung lungna, a guk in khuttum a zial a, khut thâk ziang ding nuam a hi dan a hiatthei hi. Moody chun damtak chan, “*La zakda ka gen a um chun ei ngaidam in, dawtna pangai tak dawng in ka kingai ah a hi*” atia. Zia pa chun “*la na kha kisp mai mai in*” a hung ti phut mai hi. Moody chun “*zia hi ka na a hi*” ti’n dawisak tak in Lal Jesu pawm ding in a chial a, Thathum a liam nung a chun Moody kawtkhak chu a va kiu ta mai a, Insung ah a lut nung a chun zia pa chun, “*Zan khat ah thiltung*

kha khawk kasa khawp mai hi, zia zan a pat khan ka um hi a nuam thei mawng mawng puai, la thugen kha ka beng ah a gi zing ta mai a, zanitak le ka imu thei pua, la kiang ah hung ah ei pauchap piak ding a hung chial ding in lunggel ka siam tai” a ti tai.

Zia pa chun Lal Jesu chu a Lal leh hukdamtu ding in a pawm tai. A thugen masak pen chu - “*Lal Jesu a ding in bang ka bawl thei diam?*” ti hi a hi. America gam ah tualsung kidona a um masang sia kha Sabbath School ah ziltitun a pang a, zia kidona a chun kaplup lak in a hung pang kha tai, maleh kumtuang hinna nei in a Lalpa â ding in na a sêm man hi.

~ Courtesy: Ramthar



Sunna

UPA LIANKHOLUN

(April 12, 1940 – September 4, 2024)



Upa Liankholun (84) hi (L) Pu Zamnek leh (L) Pi Niangneilam te gil ah ga gochan 11 te lak ah a 10-na a hi. Ama hi April 12, 1940 ah khan Phailengjang, Kangpokpi District ah a piang hi. Date 5.10.1965 ah khan Pi Niangtinkim tawh Rev. Chungsei khut in Gotangkot Biak-In ah a la kicheng ua, gil ah ga gochan numei 4 leh Pawsal 3 a nei ui. Tu mêl Numei 7 leh Pawsal 1 a mu malam hi.

Nasepna lam:

1961 kum December tha ah khan Manipur Rifle in a la pang ah, maleh insung leh khawsung enkawltu ding a pawimaw ziak in Insung mite dawisakna gual in October 1967 ah khan Pension manlo in a la haisan tai. Kum 2000 kum ah khan Gotangkot ah kipat in Lamka ahung chenglut ah MPCS Lamka Kochuam ah lawi in Kum 2013 October 13 ah khan Rev. Lalbiaknunga khut in Lamka Kochuam ah Upa hi ding in Lamka North Presbytery, Pengjang Kochuam Biak-In ah Ordination a la chang hi (13.10.2013)

Kum 2017 April ah a lawinu Pi Niangtinkim in a beisan nung in ama le October tha ah kipat khan taksa hatlona ahung nei pan ah damdawi In chuam chuam Imphal, Delhi te ah etkaw! in a um hi. Lung infection nei ahi ti Shija Hospital ah a kietkaw! apat in mudaw ahia, chawmkhat zaw in lungchang lam natna (Heart case) le nei ahi ti a kimandaw kit hi. Hun sawtpi Imphal ah etkaw! a hi zinglai in gamsung buaina ziak in a kisunzawm thei

November 2024

tapua. Aizawl lam leh khawtual i.e. Lamka District Hospital leh Private Clinic chuam chuamte ah thei kham kham in a ki-enkawl sunzawm hi. A hat haksat ziaik in Lamka sung ah Clinic chuam chuam in a kipui sek ah chutia etkawl ahi zinglai ahin September 4, 2024 sîn ah khan sîn a imutna ah buai in a hung thodawk kit zo tapua, dak 1 tuam in a it a ngai cheng nusia in kumtuang gam eila zawtsan ta a hi.

Kochuam in -

Treasurer : 2014-2015
Vice-Chairman : 2019
Building Chairman inle a la pang hi.

Bial ah -

Standing Committee : 2017-2021
Nomination Committee : 2020

Presbytery ah -

Palai in : 2022-2023

Vuiliamna:

Inlam ah Kochuam Programme Bialtu Pastor Rev. Vanlalchhuanga in hun mang in, Biak-In a Kochuam Lapawl ten La sa in Upa Nengkhothang, Lamka North Presbytery Moderator in thamuanna thu gen in it tak in a vuiliam a hi.

*Report Petu,
Upa Lunkhokai Vaiphei
Secretary
Lamka Kochuam*